

DEO OPTIMO MAXIMO
UNI ET TRINO,
VIRGINI DEI-PARÆ, ET S. LUCÆ,

Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS.

*manè discutienda in Scholis Medicorum, die jovis quartâ mensis
Martii, anno Domini M. DCC. LXXIII.*

M. NATALI-MARIA DE GEVIGLAND, Regiorum in Germaniâ Ducum
& Militum Nosocomiorum nuper Medico, M. CAROLLI-LUDOVICI
LIGER, Vices Gerente, Doctore Medico, Præside.

An Frictus sit salutaris?

TANTA est proportio, liquidum inter & firmum, firmum & firmum di-
versum & ejusdem generis, liquidum & liquidum cujuscumque generis,
inter partes corporis quodam molem, duritiem, numerum, situm &c. ut am-
borum uno mutato mutetur & alterum necesse sit. Utrumque quot habeat
phasas infandum! Qualis utriusque commutatio vix dicendum! Amborum
vicissitudines, ex uno in alterum transmutationes, inter utrumque analogiam,
proportionem, comparationem, similitudinis atque dissimilitudinis diversos
respectus enarrare quis poterit? Multifariam enim multisque modis alteran-
tur, corrumpuntur, generantur, atque metamorphosi omnimodâ, tot tam-
que diversæ quinimodò omnes formæ educuntur è materiæ penu quæ est om-
nium corporum subjectum, eorumque proprietatum fons & origo, quippe
quæ omni & soli corpori communicatur multigenis variata figuris, modò enim
simplex modò diversa sentitur, uniformis modò, modò varia, homogenea,
heterogenea, constans, mobilis,

Non quod multa parum simili sint prædita formâ,

Sed quia non vulgò paria omnibus omnia constant.

materia enim nusquam destruitur, neque cadaver est, neque sepulchrum, sed
cadaver & sepulchrum sibi; nec Cælo, nec terris, nec aquis, sed ubique ja-
cet; horumce nulla est, sed omnia: ipsa enim totius mundi hujusce aspec-
tabilis pro theatro sese mutuò præbet atque subjicitur in quo personas omnes
hujus comediæ rectè regit auctor motus ex quo figuræ formantur, aggeritur
moles, nascuntur tandem omnes corporis modificationes peritura, in nova

† Auctore M. DAVID VASSE, 1722.



Luct. l. 2.
vers. 336.
337.

corpora denud mutandæ. Ipse si quidem totus occupatur in corporum omnium conciliandis figuris, nihil quod penes eum non sit, totum & omne regit, gubernat, producit, destruit, naturâ tamen semper remanente constanti indestructibili cujus facies semper eadem.

II.

CORPUS in partium ipsum componentium motu constanti perpetuoque consistens, pro ipsius motus quantitate, diversitate, modo, temporis spatio & aliis circumstantiis quibus afficitur tale aut tale in sua specie prædicatur: ipsum autem judicatur sanum pro hujusce systematis legum rectitudine aut ab ipsis deviatione. Vitam hominis quandiu durat in partium corporis functionibus tum vitalibus, tum naturalibus, tum animalibus consistere, nemo est qui inficiatur: ipsas augeri, minui, vitâ superstiti, deprehenditur, cum in iisdem sit ingens graduum diversitas; sanitas enim est facultas corporis apta omnibus actionibus perfectè exercendis, & omnes actionum illarum effectus ad motus determinatos & ad assumptorum immutationem revocantur. Status ergo corporis viventis habens facultatem exercendæ cujuscumque actionis dicatur sanus, cujus idea est præsentia requisiti ad exercitium possibile actionis vel absentia repugnantis exercitio eidem; qui enim actiones homini proprias exercere valet cum facilitate, oblectamento & quâdam constantiâ eum sanum habemus, quem verò easdem exercere non posse aut tantum eas peragere cum molestiâ, dolore citâque defatigatione animadvertimus, eundem vocari & esse agrotantem quis negaverit? Ut itaque actiones sic morbi distingui possunt, ut conditiones ad actiones, ita & harum defectus, qui enim haberet perfectè intellectas omnes conditiones requisitas ad actiones, ille perspiceret clarè defectum conditionis ex cognito morbo, & rursum benè caperet ex cognito motus defectu naturam morbi inde necessariò sequentis. Motus igitur mensura, naturæ mensura, unde sanitatis sive substantiæ mensura.

III.

ATQUI corporis exercitatio hanc constantiam in functionibus conservat & augeat; sive enim contineat solida & liquida in suâ renitentia æquilibri, relaxando fibras crispas, contrahendo filamenta partium solutarum, vacuando humorum redundantiam, sanguinis & humorum diathesim alterando, istorum citiorem motum compefcendo, ipsum lentiorē provehendo, utriusque partis molem augendo, minuendo, sive aliis quibulque modis vitam ferver, augeat, roborēt. Omnes enim corporis partes ad sui ipsius sanitatem non solum contribuunt efficiendam, sed ipsamet partes naturaliter dispositæ & motæ sunt sanitatis causa essentialis & proxima atque ipsissima sanitas, quæ pendet à rectâ sex rerum non naturalium administratione: ex istorum enumeratione principem locum tenent frictions in motuum genere, quæ sunt levissimæ exercitationes quarum diversitas salubri-

tasque defumuntur à tempore, loco, mensura, & modo quibus corpori adhibentur. Excretio crassi tutissimis iuvanda iis quæ magis excitent fibras, & solvant excernenda: præcipua sunt vapores, fotus, inunctiones, balnea concomitante frictu: juvenibus enim, senibus, & iis quibus viscera debilia, difficilis digestio, vita quieta, sedentaria, otiosa; hæc maximè profunt præsertim si habeatur ratio ætatis, temperamenti, consuetudinis, & aliarum circumstantiarum quæ pertinent ad Hygienem. In genere modus faciendæ frictionis definitur rubore & tumore, tunc enim à frictione abstinendum præsertim si corpus gracile fuerit reficiendum, si crassum extenuandum. Convenit frictio tempore hyberno & autumno, depositis prius excrementis tum alvi cum vesicæ, tunc aut totum corpus aut pars fricanda lavanda, sordes detergendæ, & linteis modicâ compressione ac celeritate fricandum.

I V.

MULTÆ sunt frictionis species. Duplex tamen hæc loci maximè consideranda venit, præparatoria scilicet & apotherapeutica. Illa exercitatione præcedit ne quid rumpatur vel obstruatur mutatione subitâ à quiete ad motum; etenim frictione exiguâ partes solidæ incalescentes remolliuntur, excrementa extenuantur meatusque laxantur: hæc verò minoribus & blandioribus motibus perficitur cum olei perfusione quæ partes corporis humectat ac recreat; si quid hæreat meatibus discutit & corpus à lassitudine tutum reddit. Si frictio fuerit mollis carnem laxat, mollit, meatus aperit; si fuerit dura cogit, siccit & adstringit; pauca carnem leviter remittit, redditque contrectabilem; multâ liquat, & extenuat & si dura simul fuerit contrahit, corporisque molem deprimit; mediocris verò modicè calefacit, distributionem juvat & carnem augeat. Frictio adhibetur ad reficiendum, vacuandum, revellendum. Nam quos siccitas macerat vespertina artuum juvat frictio ut in partes externas sanguis distribuatur. Si purgatio universa aliquid reliqui fecerit frictione discutitur; eadem ratione capitis & artuum frictio matutina referatis cutis meatibus humores eliminat. Ad revellendum etiam advocatur frictio, fors enim materiem evocat ac digerit, quâ discussâ alia in partem defricatam confluit: si totum corpus fricari convenit, primum crura à superiore parte deorsum, linteis non admodum mollibus, sed modicè asperis, deinde & tota brachia ab humeris usque supernè deorsum simili modo sunt fricanda; at ubi artus omnes abundè calere videntur & metus est ne quis ex multitudine frictionis lassitudinis sensus superveniat, oleo utendum est: cum jam artus plurimum perfrecti fuerint, postea oleo detergentur. Indè ad dorsum spinam transeundum est, hæcque tota perfrectanda similiter, ab hac rursus ad crura & hinc ad brachia, mox indè rursus ad spinam remeandum & ita quantum necessè est fricandum.

SICUT inchoante rachitide, existente phthisi, incremente senio, conducit introductio nutrimenti per apposita externa halitu, fotu, balneo, clysmate, unguento; ita purgationes cutis externæ per frictiones, loturas, balnea, fomenta, natationes, deterfiones egregiè profunt. Capitis præsertim scalpura cum pectine retrorsum in vertigine, epilepsiâ, ophthalmiâ, aurium dentiumque doloribus, tonsillarum, gingivarum, uvæ inflammationibus, cervicis atque totius capitis fluxionibus. Collutio oris est quædam deterfionis atque frictionis species quæ adhibetur in aphthis, & aliis dentium, linguæ, palati, uvulæ & aliarum partium oris doloribus atque morbis. Quotidie cum repidâ est prophylacticum oris; sicut & levis deterfio oculorum, aurium, totius faciei, pedum manuumque, axillarum & inguinum cum leviori frictione. Universas corporis partes suis mensurâ & modo sigillatim fricari oportet. Frictionibus enim color & calor nativi augentur naturales actiones in toto corpore feliciter perficiuntur, excrementa expelluntur, exigui meatus purgantur, membra aluntur & fiunt ad labores robustiora. Frictiones suppleant aëris & loci mutationi, deambulationi & aliis exercitiis à motu locali. Qui litterarum studio incumbunt, qui morbo laborantes in cubili detinentur, aut qui saltationi, pilæ magnæ & parvæ ludo, deambulationi, equitationi, vehiculo sive curru, lecticæ, navigio assueti hisce exercitiis non indulgent, eos fricari bonum est.

Ergò Frictus est salutaris.

Proponebat Parisiis JOANNES. CAROLUS DE BROTONNE,
Laudunensis, Doctor Medicus Remensis, Saluberrimæ Facultatis Parisiensis Baccalaureus, A. R. S. H. 1773. à sextâ ad meridiem.